

KAPÍTULU I

PRINSÍPIU JERÁL

Artigu 1º (Dahuluk)

Ámbitu (Kona-ba)

1. Regulamentu akadémiku maka regulamentu ida-ne'ebé bazeadu iha Estatutu Universidade Nasionál Timor Lorosa'e, Universidade Públika Estadu nian, no regula atividade sira hanorin nian no asesu ba Ensinu tuir regulamentasaun ne'ebé funsiona tiha ona, liuliu Ensinu Superiór iha Timor-Leste.
2. Regulamentu Akadémiku Jerál ida-ne'e funsiona iha Universidade Nasionál Timor Lorosa'e
3. Regulamentu espesífiku ne'ebé bazeia ba iha Regulamentu Akadémiku Jerál ida-ne'e funsiona iha Faculdade no Departamentu sira

Artigu 2º (Daruaq)

Prinsípiu Jerál

1. Universidade Nasionál Timór Lorosa'e, ho nia dosente sira, funcionáriu no estudante sira tenke aplika regulamentu ida-ne'e ho boafé no respeito ba prinsípiu sira-ne'ebé harii tiha ona hanesan tuirmai ne'e:
 - a) **Prinsípiu Igualdade nian** – nein ema-ida maka sei benefisiadu ka prejudikadu, privadu ba nia direitu sira ka livre husi nia devér sira tuir nia funsaun ka knaar ne'ebé nia simu, jéneru, rasa, dalen, orijen, relijiaun, haliis ka fiar ba polítika no ideolojia ruma, situaun ekonómika ka kondisaun sosiál.
 - b) **Prinsípiu Akadémika loloos** – avaliasaun hotu-hotu no traballu akadémiku sira sei hetan avaliasaun husi dosente sira, ho respeito ba padraun proporsionalidade nian ne'ebé aas, transparénsia no lójika, haree ba valorizasaun traballu nian no estudu ne'ebé estudante ne'e hala'o, fó-apoiu ba pontudevista sientífiku ba nia ideia sira no ba traballu sira-ne'ebé nia rasik dezenvolve..
 - c) **Prinsípiu ba utilizaun dalen ofisiál sira** – Universidade Nasionál Timór Lorosa'e promove ensinu iha dalen Tetun no Portugés, laiha impedimentu ba protokolu no programa sira-ne'ebé dezenvolve iha ámbitu koperasaun internasionál, interkámbiu akadémika nian no kursu linguístiku ba idioma estranjeiru sira.



- d) **Prinsípiu Transparénsia Finanseira** – Tuir kastigu asaun dixiplinár nian, ba makseluk no maksimuk, bandu halo pagamentu ka taxa la ofisiál ruma husi estudante sira ba dosente ka funsionáriu UNTL nian, anaunserke iha kazu sira ne'ebé klaramente autorizadu. Só pagamentu sira-ne'ebé estudante sira tenke hala'o maka propinas no taxa ofisiál sira-ne'ebé aprovalu tuir despaxu Reitor nian.
- e) **Prinsípiu Onestidade Intelektuál** – Objetivu estudante universitáriu nian maka autonomia no kuriozidade, hanesan ema intelektuál ne'ebé kle'an, ne'ebé distingue, nia an rasik, saida maka nia hanoin no saida maka pertense ba sira seluk. Traballu eskritu hotu-hotu ka traballu iha finál kursu nian (TFK), monografia, estudu (peskiza), teze no obra seluk tuir mundu akadémiku nian sei tuir Prinsípiu Onestidade Intelektuál, hatudu ba dosente avaliador, ninia hanoin sira husi parte ida, no saida maka nia estuda husi teoria ne'ebé nia aprende husi parte seluk, ho separasaun katak, saida maka ninian no saida maka ema seluk nian.
- f) **Prinsípiu Respeitu ba Kuriozidade Sientífika** – Kualkér individuu livre hodi tuir opiniaun no teoria oioin husi lisaun sira-ne'ebé hetan iha saladeaula ka suporta husi matenek-na'in sira seluk, buka-hatene husi ninia atividade no estudu hodi defende sientíficamente nia teoria sira no akreditadu, no respeitu ba opiniaun no teoria akadémika hosi nia kolega sira.

Artigu 3º (Datoluk)

Funsaun Universidade nian

1. Universidade Nasionál Timór Lorosa'e desenvolve atividade iha área sira :
 - a) Ensinu;
 - b) Investigasaun Sientífika;
 - c) Prestasaun servisu ba Komunidade ka servisu estensaun nian sira
2. Desenvolvimentu atividade sira-nian, temi iha alínea b) no c) pontu ida (1) husi artigu ida-ne'e nian, sei regula iha regulamentu própriu.
3. Iha desenvolvimentu ba nia atividade Ensinu nian, Universidade Nasionál Timór Lorosa'e konfere grau akadémiku tuirmai ne'e, tuir termu lei nian:
 - a) Baxarél;
 - b) Liseniadu;
 - c) Mestre;
 - d) Doutór.

Universidade Nasionál Timór Lorosa'e bele konfere kursu ne'ebé la konferente ba grau akadémiku, hanesan pós-graduasaun no título análogo sira seluk ne'ebé lei permite.



KAPÍTULU II
ORGANIZASAUN BA PLANU KURRIKULÁR SIRA

Artigu 4º (Dahaat)

Matríkula no Inskrisaun

1. Matríkula mak aktu iha-ne'ebé estudante iha ligasaun direta ho Universidade, hetan kualidade estudante nian no direitu ba inskrisaun iha sira-nia kursu sira-ne'e ida no liuliu iha planu kurrikulár.
2. Matríkula okorre de'it iha momentu admisaun ba estudante, limitada ba número vaga ne'ebé loke kada tinan, no sei sai objetu ba regra admisaun alunu foun UNTL nian sei regula iha regulamentu própriu.
3. Inskrisaun maka aktu ne'ebé fakulta estudante, depoizde matríkula hotu, frekuénsia dixiplina sira iha semestre tuirmai husi kursu ida nian, sei realiza iha inísiu semestre ida-ne'e duni tuir kalendáriu akadémiku.

Artigu 5º (Dalimak)

Planu Kurrikulár

1. Planu kurrikulár ba kursu ida, maka konjuntu organizadu dixiplina sira-nian ne'ebé estudante tenke hetan aprovasaun hodi simu grau akadémiku ida-ne'ebé determinadu ka kursu ne'ebé lakonferente ba grau akadémiku.
2. Kada dixiplina atribui número espesífiku kréditu (ECTS) nian ida ne'ebé espresa volume traballu nian, ne'ebé estudante tenke realiza durante semestre ida hodi hetan aprovasaun iha dixiplina ne'e.
3. Planu kurrikulár sira, organiza tiha ona tuir forma semestrál, atinje total kréditu (ECTS) 30 ba kada semestre, fahe entre dixiplina lima ka neen ba kada semetre
4. Konsellu pedagójiku no sientífiku kada fakuldade nian, tuir proposta husi kada diretór Departamentu ida-ne'e nian ka Diretór eskola nian, tenke elabora lista ekivalénsia ida entre dixiplina sira, iha planu kurrikulár kursu baxarelatu nian no dixiplina sira iha planu kurrikulár kursu lisensiatura nian.



Artigu 6º (Daneen)

Kréditu ECTS

1. UNTL adopta sistema europeu iha transferénsia no akumulasaun kréditu nian, mós koñesidu hanesan sistema internasionál kréditu ECTS nian ho naran “*European Credit Transfer and Accumulation System*”.
2. Sistema ida-ne’e sumariza husi síklu estudu nian ida ne’ebé asosia ba kada unidade kurrikulár sira-ne’e ida valór ida (númeru kréditu nian), fiksadu ho baze iha traballu ne’ebé estudante tenke realiza iha unidade programa kursu ne’e nian. Númeru kréditu nian mak sukat traballu estudante nian tuir forma hotu-hotu ne’ebé temi tiha ona, sesaun ensinu ho natureza koletiva, sesaun pesoál ka natureza tuturiál, estájiu, projetu, traballu iha terrenu, estudu autónoma no prova avaliasaun nian.
3. Grau akadémiku ne’ebé temi tiha ona iha artigu 3º rekoñese ho forma tuirmai ne’e:
 - a) Grau Baxarél iha másimu kréditu ECTS 180, no ho nia durasaun normál, semetre 6
 - b) Grau Licenciadu iha kréditu ECTS entre 180 no 240, no durasaun normál semestre 8
 - c) Kursu mestradu, doutoramentu no kursu lakonferente ho grau akadémiku sei define iha regulamentu própriu.
4. Iha situausaun sira-ne’ebé asesu ba prátika atividade profisionál ruma obrigatoriamente, liuliu kursu sira-ne’ebé maka konfere ba grau licenciadu tenke hetan númeru kréditu ECTS nian no durasaun aas liu hatudu iha alínea b) pontu 1 artigu ida-ne’e nian, to’o másimu kréditu ECTS 360 no ho durasaun normál ne’ebé aas, ne’ebé temi tiha iha númeru 3 artigu ida-ne’e nian.

Artigu 7º (Dahituk)

Lisensa Letiva

1. Lisensa letiva mak aktu, iha-ne’ebé estudante husu pauza ida iha nia estudu, suspende ka hapara tiha durante semestre ida ka rua ho objetivu atu halo kontajen ba tempu normál preskrisaun nian sira no naran kontajen tempu nian seluk ida, liuliu apuramentu ba nia grau akadémiku nian.
2. Estudante bele rekere lisensa letiva, ho durasaun máxima semestre rua, dala ida de’it durante frekuensia kursu ida nian no só bele permite ba estudante sira-ne’ebé maka matrikula tiha ona pelumenus semestre rua.
3. Estudante ho lisensa letiva la permite atu asesu ba naran kualkér atividade akadémika ida
4. Estudante ida bele rekere lisensa letiva liu dala ida iha kazu sira konsideradu boot ka todan hanesan tuirmai ne’e :
 - a) Isin-rua todan durante fulan-haat, fulan ida molok atu tuur-ahi, no to’o fulan 3 depoizde tuur-ahi, ho apresentasaun komprobativu husi médiku



- b) Moras ka asidenti-klíniku todan ne'ebé, temporáriamente, la permite atu kontinua atividade akadémika sira, ho apresentasaun komprovativu husi médiku.

Artigu 8º (Dauluk)

Rejime Admisaun no Readmisaun

1. Admisaun mak aktu husi estudante kandidatu ne'ebé aprovalu ona, ba halo Matrícula no hahú nia estudu sira iha UNTL tuir Lei no regulamentu sira-ne'ebé aplika iha Timór-Leste, iha asesu ba ensinu superiór.
2. Readmisaun maka prosesu reintegrasaun estudante laativu nian ida, ho livre-vontade, iha fakuldade no Departamentu iha Universidade Nasionál Timor Lorosa'e.
3. Estudante ne'ebé konsideradu laativu automatikamente iha kazu sira tuirmai ne'e:
 - a) La halo inskrisaun liu semestre ida tuituir malu;
 - b) La halo inskrisaun depoizde kompleta lisensa letiva ida
4. Halo Readmisaun liuhosi verifikasaun ba kondisaun sira tuirmai ne'e:
 - a) Autorizasaun Reitor nian liuhosi apresentasaun karta justifikasaun auzénsia ka falta husi estudante.
 - b) Períudu laativu nian másimu semestre rua ba estudante;
 - c) Seidauk hetan espulso husi kursu ne'ebé frekuente hela tanba motivu dixiplinár sira;
 - d) Kumpri rekizitu administrativu no finanseiru nian ne'ebé baibain halo;
5. Semestre sira ne'ebé estudante laiha justifikasaun ba lisensa letiva, konta ho prazu relativu ba durasaun planu estudu nian no preskrisaun

Artigu 9º (Dasiak)

Transferénsia no Interkámbiu

1. Transferénsia interna mak aktu iha-ne'ebé estudante UNTL ida hakarak inskreve iha kursu seluk, ba ida-ne'ebé realiza ona último inskrisaun, iha Ensinu Superiór ida-ne'e duni, konsege ka lapara halo inskrisaun.
2. Transferénsia Esterna mak aktu ida-ne'ebé estudante husi Ensinu Superiór seluk ida hakarak matrícula no inskreve iha UNTL.
3. Transferénsia (Esterna ka Interna) só permite kuandu estudante ne'e mai husi Instituisaun Ensinu Superiór ne'ebé akreditadu no sei submete obrigatoriamente ba aprovasaun no prosedimentu sira tuirmai ne'e:
 - a) Avaliasaun husi konsellu-sientífiku no Pedagogíjiku iha fakuldade ne'ebé simu pedidu tranferénsia ne'e, husi koñesimentu ne'ebé hetan ona iha instituisaun ne'ebé nia mai



- no ekivalénsia sira-ne'ebé bele aplika, depoizde rona....husi Diretór-Departamentu kursu ne'e nian, ne'ebé estudante ne'e kandidata bá;
- b) Aseitasaun husi konsellu direktivu Fakultade nian ne'ebé simu pedidu ne'e tenke haree mós ba número vaga ne'ebé disponivel, fó prioridade ba estudante sira-ne'ebé matrikula ona iha UNTL, iha nivel entrada kandidatu ne'e nian (tinan ka semestre ne'ebé nia tama);
 - c) Autorizasaun Reitor nian, tuir verifikasaun sira-ne'ebé realiza ona iha alínea a) no b) número ne'e nian.
4. Interkámbiu estudante nian bele mós *inbound* ka *outbound*, liuhosi verifikasaun iha sirkunstánsia sira tuirmai ne'e :
- a) Interkámbiu **inbound** mak instrumentu kooperasaun nian ne'ebé estudante husi Instituisaun Ensinu Superiór ida ne'ebé akreditadu kondús nia atividade akadémika sira (peskiza, ensinu ka estensaun) iha UNTL iha ámbitu akordu nian ida entre UNTL ho instituisaun orijen, husi períudu ida-ne'ebé laliu fulan-6 ba kada estudante;
 - b) Interkámbiu *outbound* mak instrumentu kooperasaun nian iha ne'ebé estudante UNTL ida kondús nia atividade akadémika sira (peskiza, ensinu ka estensaun) iha Instituisaun Ensinu Superiór Akreditada seluk ida, iha ámbitu akordu nian entre UNTL ho instituisaun ne'ebé estudante ne'e bá, husi períudu ida-ne'ebé laliu fulan-6 ba kada estudante;
5. Kondisaun sira no prosedimentu ne'ebé akresenta hodi realiza transferénsia no interkámbiu sira-ne'e, bele aprofunda iha regulamentu suplementar ne'ebé fó-sai husi servisu kompetente iha nivel fakuldade.

Artigu 10º (Dasanuluk)

Rejime Preskrisaun

1. Atu konklui kursu ne'ebé matrikula tiha ona, estudante tenke kumpri número kréditu ECTS sira-nian ne'ebé fó-sai tiha ona antes iha artigu 6º, tuir limite no prazu másimu preskrisaun nian tuirmai ne'e:
- a) Grau Baxarél : to'o másimu inskrisaun 10 (tinan 5);
 - b) Grau Licenciadu: to'o másimu inskrisaun 12 (tinan 6), anaunserke iha kazu sira-ne'ebé previstu iha artigu 6º, número 5;
 - c) Kursu mestradu nian, doutoramentu no kursu lakonferente ho grau akadémiku, define tiha ona iha regulamentu própriu.



2. Se karik estudante la konklui kursu ne'ebé maka matríkula tiha ona no rejista iha limite ne'ebé estabelese ona iha pontu 1, nia matríkula sei preskrita no sei lakon kategoria estudante nian, tenke husu readmisaun iha termu Artº 8º/4 se karik hakarak.
3. Estudante ne'ebé hasai tiha iha lisensa letiva, estudante ne'ebé lainskreve liu semestre rua simu konsekuénsia lakon kategoria estudante Universidade nian, labele hetan filafali nia kategoria sei halo matríkula foun, liuhosi prosesu readmisaun.
4. Lisensa letiva interrompe kontajen número nian ho másimu inskrisaun hatudu tiha ona iha pontu 1.

Artigu 11º (Dasanulu-resin-idak)

Programa Dixiplina sira-nian

1. Ba kada dixiplina tenke eziste no fó-sai ba públiku, iha prazu másimu loron sanulu-resin-lima depoizde aula sira hahú, iha programa ida sei fiksa:
 - a) Objetivu dixiplina nian (koñesimentu ne'ebé estudante tenke hetan hodi konklui dixiplina ne'e ho susesu);
 - b) Hatama iha planu kurrikulár ne'ebé refere;
 - c) Konteúdu programátiku sira;
 - d) Bibliografia ne'ebé rekomenda tiha ona (obligatória no komplementár);
 - e) Rejime avaliasaun nian ne'ebé disponivel;
 - f) Ezisténsia sientífika obligatória sira-ne'ebé iha tiha ona antes (bainhira bele aplika);
 - g) Informasaun seluk ne'ebé iha relasaun ho funksionamentu dixiplina nian, tuir fixa ne'ebé apresenta tiha ona iha aneksu 1.
2. Programa dixiplina sira-nian ne'e responsabilidade dosente sira-ne'ebé maka koordena dixiplina sira-ne'e, labele falta atu halo kordenasaun globál ho orgaun competente sira ba efeitu ne'e/, liuliu Konsellu Sientífiku no Pedagójiku kada Faculdade nian no konsellu Doutór sira UNTL nian.

Artigu 12º (Dasanulu-resin-ruak)

Sumáriu Aula sira-nian

1. Kada dosente tenke elabora sumáriu deskriptivu ida no matéria ne'ebé define tiha ona hodi hanorin iha kada aula no fó-koñese ba sira durante semana ne'ebé aula ne'e la'ó (durante hanorin iha semana ida nia laran).
2. Kada dosente tenke matein rejistu eskritu ida kona-ba nia atividade akadémika sira, inklui:
 - a) Sumáriu Aula sira-nian;



- b) Prezensa estudante sira-nian iha aula;
 - c) Avaliasaun ba traballu-kaza estudante sira-nian;
 - d) Kópia frekuénsia teste nian sira no ezame ho korresaun ida-idak;
 - e) Dokumentu sira seluk husi departamentu ne'e nian ne'ebé relevante ba invetigasaun ida-ne'ebé natoon ba nia atividade akadémika sira.
3. Iha finál kada semestre nian dosente entrega rejistu kompletu ne'ebé temi ona iha leten, labele lakon direitu atu konsulta ho Diretór Departamentu ka orgaun kompetente sira iha Fakultade.

Artigu 13º (dasanulu-resin-toluk)

Inkérítu Pedagójiku

1. Iha finál kada semestre nian, estudante sira tenke sai sentru inkérítu nian ho karákte anónimu kona-ba funsionamentu dixiplina sira-nian ne'ebé maka sira frekuenta bá, no aspetu seluk ne'ebé relasionadu ho atividade akadémika sira, tuir DL nº 21/2010.
2. Inkérítu sira bele realiza *online* liuhosi sistema informasaun no Rejistu Akadémiku (S.I.R.A.).
3. Ideia, rekolla no tratamentu ba inkérítu avaliasaun nian sira ne'e koordena husi orgaun kompetente ba área avaliasaun akadémika no institusionál UNTL nian, rezultadu sira ne'e sei fó-sai publikamente.

Artigu 14º (dasanulu-resin-haat)

Inskrisaun iha Dixiplina sira

1. Inskrisaun mak aktu ne'ebé permite estudante sira, ho matríkula ne'ebé válidu iha Universidade, frekuénsia dixiplina nian oioin no planu kurrikulár sira.
2. Nein estudante ida bele frekuenta ka avaliadu iha dixiplina ida bainhira nia naran lainklui iha lista rejistu nian.
3. Direitu inskrisaun nian sei hapara hodi hetan aprovasaun ba dixiplina ne'ebé refere.
4. Estudante tenke konklui traballu hotu-hotu, teoriku ka práttiku, alende elaborasaun relatóriu nian, hanesan mós ho atividade sira seluk ne'ebé dosente sira estabelese tiha ona.

Artigu 15º (Dasanulu-resin-lima)

Prazu

1. Inskrisaun sira, hala'ó iha Divizaun Administrasaun Akadémika nian, iha prazu sira-ne'ebé estabelese ona iha kalendáriu akadémiku



2. Termina tiha prazu sira-ne'ebé refere iha número anteriór, estudante sei bele realiza inskrisaun sira, durante loron hitu tuirmai, liuhosi pagamentu taxa nian ida ho valór ne'ebé Konsellu Jestaun fiksa.
3. Inskrisaun ne'e semestrál.

Artigu 16º (Dasanulu-resin-neen)

Kondisaun Inskrisaun ba Dixiplina sira

1. Estudante tenke inskreve ho dixiplina sira tuir nia planu kurrikulár Kursu nian.
2. Pursemestre, estudante tenke estuda to'ó másimu kréditu ECTS 30.
3. Estudante bele inskreve iha kursu estensaun nian no atividade estra-kurrikulár sira seluk ne'ebé promove ona husi UNTL, maibé estudante ne'ebé inskreve iha dixiplina ida-ne'e duni tuir nia planu kurrikulár ne'ebé iha tiha ona antes iha prienximentu vaga nian ne'ebé disponivel.

Artigu 17º (Dasanulu-resin-hituk)

Akonsellamentu Akadémiku

1. Akonsellamentu Akadémiku mak atividade integrante ida ba devér dosente UNTL nian.
2. Akonsellamentu Akadémiku realizadu husi Orientadór Akadémiku ne'ebé nomeadu ho objetivu atu ajuda estudante konkretiza ninia poténsia intelektuál no umanu, hodi hetan aproveitamentu di'ak ba nia esperiéncia iha UNTL, motiva no akonsella estudante iha ninia planeamentu estudu nian.
3. Kualkér dosente UNTL nian bele sai Orientadór Akadémiku tuir número estudante nian ida-ne'ebé determinadu ona, no asumi funsaun tuir Despaxu Nomeasaun nian husi Dekanu Fakultade, liuhosi rekomendasaun Diretór Departamentu ne'ebé refere.

Artigu 18º (Dasanulu-resin-ualuk)

Orientadór Akadémiku

1. Knaar Orientadór Akadémiku nian maka:
 - a) Fó orientasaun kontínua ba estudante iha progressaun kursu nian no valorizasaun ba nia estudu;
 - b) Fó apoiu ba estudante hodi rezolve problema sira-ne'ebé relasionadu ho vida estudante ensinu superiór nian;
 - c) Motiva estudante hodi hetan forma oioin hodi hadi'a efisiénsia ba nia estudu para hodi hetan rezultadu ne'ebé di'ak;



- d) Hala'ó no informa ba estudante kona-ba informasaun ne'ebé mak serve liliu ba traballu no prazu sira-ne'ebé Universidade estabelese hodi fó-apoiu ba estudante sira.

KAPÍTULU III

REJIME JERÁL AVALIASAUN NIAN

Artigu 19º (Dasanulu-resin-siak)

Avaliasaun ba Dixiplina sira

1. Avaliasaun ba aproveitamentu eskolár ba kada estudante hato'ó iha avaliasaun kompleksu ida reprezenta ho "nota" no espresa iha eskala numérica husi zero to'ó dés (sanulu). Klasifikasaun ida-ne'e bele rezulta rejime avaliasaun nian ida tuirmai ne'e:
 - a) Avaliasaun kontínua;
 - b) Avaliasaun ho ezame finál, karik halo parte ba programa dixiplina nian;
 - c) Seluk, define husi dosente, depoizde estudante konkordánsia, no valida ona husi presidente jurí ba avaliasaun dixiplina nian.
2. Rejime avaliasaun kontínua nian tenke, sempre posível, sai primeira opsaun ba avaliasaun nian.
3. Iha rejime avaliasaun kontínua nian, estudante sei realiza prova ba avaliasaun oioin, rezulta klasifikasaun finál ba konjugasaun ne'ebé loloos husi elementu avaliasaun hotu-hotu ne'ebé define tiha ona antes.
4. Estudante ne'ebé hakarak sai avaliadu iha rejime avaliasaun kontínua nian tenke marka-prezensa, pelumenus , 75% husi persentajen totál aula sira-nian mensiona tuir dixiplina ne'ebé inklui iha lista rejistu nian, iha kada semestre.
5. Iha rejime avaliasaun liuhosi ezame finál, klasifikasaun finál sei bele rezulta ipóteze sira tuirmai ne'e:
 - a) Liuhosi prova eskrita ida, ka;
 - b) Liuhosi prova prátika ida, ka;
 - c) Liuhosi prova orál ida, ka;
 - d) Liuhosi konjugasaun ba kualkér prova sira-ne'ebé refere tiha ona iha alínea anteriór.
6. Prova no instrumentu avaliasaun nian sira seluk maka determina valór ne'ebé objetivamente tebetebes se bele, domínio ba kompeténsia sira-ne'ebé abranje tiha ona dixiplina sira-ne'ebé maka sira temi bá.



7. Iha kazu sira ne'ebé eziste rejime avaliasaun liu dala ida, estudante lalika komunika espresamente ninia opiniaun, naran katak apresenta konjuntu avaliasaun sira-nian ne'ebé iha tiha ona antes iha rejime ne'ebé maka nia eskolla.
 - a) Impedimentu ne'ebé latama iha regra ne'ebé fó-sai tiha ona, sei aplika iha regra-jerál sira tuirmai ne'e:
 - b) Rekursu ba rejime avaliasaun nian, bazeadu só de'it iha ezame finál ne'ebé hala'o tiha ona no laiha aproveitamentu, tanba falta-aula, pelumenus prova-avaliasaun kontínua sira-ne'e ida;
 - c) Ba estudante ne'ebé marka-prezensa iha prova rejime avaliasaun kontínua nian hotu-hotu, sei taka tiha possibilidade ba apresentasaun prova rejime avaliasaun husi ezame finál nian.
8. Klasifikasaun finál dixiplina sira-nian tenke hetan asina husi dosente responsavel ne'ebé hanorin dixiplina ne'e, no husi Diretór Departamentu ne'e nian ka Diretór Eskola nian, no sira bele afiksa iha fatin-públiku sira ka konsulta iha internet liuhosi Sistema Informasaun nian no Rejistu Akadémiku (S.I.R.A).
9. Klasifikasaun finál sira-ne'e, Diretór Departamentu nian ka Diretór Eskola nian maka tenke haruka ba orgaun administrativu ne'ebé kompetente sira iha Faculdade tuir prazu sira-ne'ebé determina ona iha Kalendáriu Akadémiku, hodi publika.


Artigu 20º (Daruanuluk)

Klasifikasaun ba Dixiplina sira

1. Klasifikasaun kuantitativa dixiplina sira-nian, fó-sai iha artigu 18, asociada ba iha klasifikasaun ida no mensaun kualitativa, tuir tabela konversaun nian tuirmai ne'e:

Klasifikasaun kuantitativa	Klasifikasaun kualitativa	Mensaun kualitativa	Rezultadu
8,5 – 10,0	A	uituon	Pasa
7,0 – 8,4	B	Bon	Pasa
5,5 – 6,9	C	Suficiente	Pasa
4,0 – 5,4	D	Medíokre	Prova-rekursu
0,0 – 3,9	E	Reprovasaun	Reprova

2. Klasifikasaun kuantitativa finál tenkeser espresa iha valór ne'ebé arredonda tiha ona to'o désima (dasanuluk)



3. Hetan klasifikasaun kuantitativa ida ne'ebé hanesan (igual) ka boot liu (superór) ho valór 5,5 korresponde ona ho klasifikasaun kualitativa hanesan ka superiór "C", implika ba aprovasaun dixiplina nian.
4. Hetan klasifikasaun kuantitativa inferiór ida ka hanesan ho valór 3,9 koresponde ona ba klasifikasaun kualitativa ida "E", implika ba reprovasaun dixiplina nian.
5. Hetan klasifikasaun kuantitativa ida entre valór 4,0 no 5,4, koresponde ona ba klasifikasaun kualitativa "D", implika katak estudante sira-ne'e tenke submete obrigatóriamente ba realizaun prova rekursu (orál ka eskrita), iha períudu rekursu nian hala'ó tuir programa dixiplina nian ne'ebé korrespondente.
6. Iha situaun ne'ebé temi tiha ona iha pontu anteriór, klasifikasaun finál dixiplina nian sei rezulta iha situaun sira ne'e ida hanesan tuirmai ne'e:
 - a. Klasifikasaun kuantitativa inferiór ka hanesan ho valór 3,9, korresponde ona ba klasifikasaun kualitativa ida ho "E", ka , reprovasaun;
 - b. Klasifikasaun kuantitativa hanesan ho valór 5,5 korresponde ona ba klasifikasaun kualitativa ho "C" ka, aprovasaun.
7. Nein estudante ida konklui ninia kursu sein hetan aprovasaun iha dixiplina obrigatória hotu-hotu iha planu kurrikulár.

Artigu 21º (Daruanulu-resin-idak)

Prova Rekursu

1. Ba prova sira rekursu nian só rezulta nota E (reprovalu) ka nota C (aprovalu), la permite avaliaun ne'ebé boot (superiór) liu C iha kontestu prova nian ida-ne'e.
2. Deziste ka la marka-prezensa laho justifikasaun ne'ebé bele aseita iha prova rekursu nian ida, implika atu hetan klasifikasaun kuantitativa ida hanesan ho zero no klasifikasaun kualitativa ida ho "E", ho reprovasaun ba dixiplina ne'e.
3. Ezekusaun prova rekursu nian implika pagamentu ba taxa suplementár ida determina tuir Despaxu Reitór nian. Laselu taxa korresponde mós ba dezisténsia estudante no reprova iha dixiplina ne'e.
4. Estudante ne'ebé reprova iha dixiplina ida, hela atrazu ho dixiplina ne'e no nia tenke inskreve kedas iha semetre ne'e duni.
5. Nein estudante ida mak konklui nia kursu sein hetan aprovasaun iha dixiplina obrigatória hotu-hotu iha planu kurrikulár.



Artigu 22º (Daruanulu-resin-ruak)

Índise Prestasaun Kumulativu


1. Índise Prestasaun Kumulativu tradús média ponderada estudante nian ne'ebé tradús tiha ba eskala numérica ida hosi 0 to'o 4 ne'ebé arredonda tiha ba sentézimas.
2. Índise Prestasaun Kumulativu, mak eskala ida ne'ebé sura husi zero to'o kuartu (haat), no ne'ebé korresponde ba rezultadu sasurak divizaun nian entre somatóriu multiplikasaun kréditu ECTS dixiplina sira-nian ne'ebé estudante inskreve husi klasifikasaun númerika ne'ebé nia hetan tiha ona, liliu ba totál kréditu ECTS dixiplina sira-nian ne'ebé maka estudante inskreve, tuir fórmula sira tuirmai ne'e:

$$\text{Média Final Ponderada} = \frac{\sum (\text{Kréditu ECTS ba Dixiplina sira} \times \text{Klasifikasaun Numérica})}{\text{Totál Kréditu ECTS nian}}$$

$$\text{Índise Prestasaun Kumulativu} = \frac{(\text{Média Final Ponderada} \times 4)}{10}$$

4. Kualifikativu sira avaliasaun husi kada estudante hanesan tuirmai ne'e:

<u>IP Kumulativu</u>	<u>Kualifikativu iha Aprovasaun</u>
3,50 – 4,00	Exelente
3,00 – 3,49	Muintubon
2,50 – 2,99	Bon
2,00 – 2,49	Suficiente

5. Estudante sira-ne'ebé konklui sira-nia estudu bele distinge ho atribusisaun *Cum Laude to'o Suma Cum Laude*, bainhira sira konklui sira-nia kursu tuir prazu estudu nian ne'ebé determina tiha ona, no lahetan nein C ida iha kualkér dixiplina sira-ne'e tuir planu kursu nian.
6. Impedimentu ba alínea anterior, kada Fakuldade sei bele aprova nia regulamentu graduasaun nian rasik ne'ebé considera ho valor aas depoizde konsulta ho Konsellu Jerál no Konsellu Doutór sira UNTL nian tuir natureza kada kursu nian no distinsaun ba nia melhór estudante sira.
7. Iha kazu sira iha pontu 6 artigu ne'e nian, Konsellu Pedagójiku no Sientífiku Fakuldade nian, propoin ba Konsellu Doutór sira UNTL nian hodi aprova kritériu alternativu sira-ne'e. 

8. Iha serimónia hotu-hotu graduasaun nian sei distinge ho forma ne'ebé hanesan ba melhór alunu husi kada Fakultade, iha tinan graduasaun nian ne'ebé refere, ne'ebé simu título hanesan *Dux* no rekoñesidu iha serimónia graduasaun ofisiál.

Artigu 23º (Daruanulu-resin-toluk)

Data ba Prova Avaliasaun

1. Data sira avaliasaun nian define tiha ona iha semana rua dahuluk (primeiru), períudu letivu nian, ho akordu ne'ebé estabelese tiha ona entre dosente husi Departamentu ne'ebé refere, sempre justifika ho rejime avaliasaun nian . Data sira avaliasaun nian define tiha ona tuir kalendáriu akadémiku no, bainhira biban, labele marka avaliasaun rua iha loron ida de'it, ba kursu ida de'it, hodi fasilita prezensa estudante sira-ne'ebé ho dixiplina atrazu ne'ebé inskritu iha semestre sira seluk.
 2. Data sira avaliasaun nian fiksa tiha ona tuir número anteriór, tenke fó-sai iha fatin própriu iha Departamentu ka Eskola ne'ebé sai responsavel ba segunda semana ikus aula nian.

Artigu 24º (Daruanulu-resin-haat)

Konsulta ba Prova sira no Reklamasan

1. Konsulta ba prova avaliasaun nian só bele realiza iha prazu másimu semana ida depoizde fó-sai rezultadu sira.
2. Estudante ne'ebé mak nia klasifikasaun latuir klasifikasaun ne'ebé nia hetan tiha ona, sei bele hato'o ba presidente jurí avaliasaun dixiplina nian ka ba dosente ne'ebé responsavel ba dixiplina ne'ebé hetan problema, iha prazu másimu loron 15 tuir kedas data divulgasaun ba rezultadu objetu reklamasan nian, ne'ebé ninia klasifikasaun verifika tiha ona, hodi fundamenta di'ak liután ninia ezijénsia, bele husu kópia prova nian.
 3. Hosi desizaun finál juri nian la tama iha rekursu, anaunserke la inklui iha konjuntu dadu nian ida, para hodi kumpri regra sira-ne'ebé estabelese tiha ona.

Artigu 25º (Daruanulu-resin-limak)

Identifikasaun iha Aktu ba Realizasaun Prova sira-nian

Dosente sira-ne'ebé enkaregadu ba vijilánsia prova avaliasaun sira-nian tenke verifika identidade estudante sira-nian ho apresentasaun kartaun estudante nian ka dokumentu identifikasaun seluk ne'ebé válidu, hetan kastigu kuandu, la halo tuir, prestasaun prova nian sei hasai tiha ka taka tiha.



Artigu 26º

Anulasaun ba Prova

Autoria, durante prova avaliasaun koñesimentu nian, hatudu komportamentu hodi habosok ema seluk hodi fó-influensia ba ema seluk nia hanoin, hodi implika atu halakon prinsípiu moral nian ne'ebé dí'ak iha nia objetivu sira, obriga estudante sira, sé maka sei responsabiliza karik apresenta faktu ka provas ruma-ne'ebé la fundamentál, ba anulasaun prova nian, independentemente ba sansaun dixiplinár sira-nian ne'ebé dalaruma bele mosu tuir Kódigu konduta UNTL nian.

Artigu 27º

Auzênsia ba Prova Avaliasaun nian

1. Bainhira estudante ida falta iha prova avaliasaun tanba motivu forsa-maiór (ema-mate), bele hato'ó, iha prazu loron-lima, nia realizasaun hala'ó iha data ida tuirmai.
 - a) Tanba motivu forsa-maiór (ema ruma mate), somente ba ema sira hanesan tuirmai ne'e:
 - b) Ninia Kaben;
2. Ka nia parente iha liña reta (Avó, Inan-aman, Oan, be'ioan sira).
3. Trata hanesan mós ba motivu forsa-maiór iha kualkér situasaun ne'ebé seidak defini ka seidak akontese antes, ne'ebé bele impede prezensa estudante nian iha prova ne'ebé refere.
4. Falta ba prova avaliasaun nian tanba motivu forsa-maiór, baibain presiza prova dokumentál.
5. Prezidente júri ba avaliasaun dixiplina iha kompeténsia avalia no decide kona-ba karakter forsa-maiór nian ne'ebé hato'ó husi estudante, iha situasaun sira-ne'ebé temi tiha ona iha artigu ida-ne'e.

Artigu 28º

Formasaun ba Jurí Avaliasaun

1. Forma tiha ona jurí kolektivu ida ba avaliasaun koñesimentu tuir kada dixiplina, sira-ne'e mak iha direitu ba determinasaun no publikasaun ba klasifikasaun ofisiál hotu-hotu.
2. Jurí, kompostu hosi mínimu elementu na'in-tolu no ho másimu na'in-lima, tenke integra obrigatoriamente ba Diretór Departamentu nian ka eskola ne'ebé refere, ne'ebé sei prezide, nune'e mós ho dosente ne'ebé hanorin dixiplina ne'e.
 3. Tuir Dekanu Fakultade, ho rekomendasaun Diretór Departamentu nian ka Eskola ne'ebé refere, iniciativa husi jurí sira avaliasaun nian iha kada dixiplina, regulamentu ne'ebé temi tiha ona tenke submete ba aprovasaun Konsellu Pedagójiku no Sientífiku Fakultade nian iha inísiu kada períudu letivu nian, depoizde regulamentu ne'e fó-sai.

Artigu 29º

Inkompatibilidade

1. Jurí sira labele halo parte iha:
 - a) Estudante sira-nia kaben;
 - b) Parente ka relasaun familiár estudante sira-nian ne'ebé besik liu ka to'o 3º grau husi maun-alin sira-nia oan;
 - c) Ema sira-ne'ebé maka iha ona sira-nia tutór jurídiku.
2. Membru jurí ne'ebé maka hetan iha kualkér situaun sira-ne'ebé temi tiha ona tenke, iha momentu ne'e kedas hato'o nia koñesimentu , deklarar, pureskritu, ba inkompatibilidade ne'ebé iha.
3. Kualkér aktu avaliasaun ne'ebé maka membru jurí nian ida interven kona-ba ida-ne'ebé verifica lakompativel, nia sei lakon kargu ida-ne'e no lavale ona.

KAPÍTULU IV

EZAME FINÁL

Artigu 30º

Époka Ezame Finál

- a) Iha kada tinan Akadémiku, kona-ba kada dixiplina, sei iha époka ezame finál tuirmai ne'e
 - b) Époka normál;
 - c) Époka rekursu.
1. Iha époka normál, kada estudante bele presta provas kona-ba ezame finál iha dixiplina hotu-hotu ne'ebé akumulá kondisaun legál ba ida-ne'e. Aprovasaun ne'e dependente ba klasifikasaun ne'ebé hetan tiha ona durante semestre ne'e, ho komponente prátiku obrigatoria sira, ne'ebé fó-sai tiha ona ho loloos
 2. Iha époka rekursu nian, kada estudante bele presta provas ezame nian ba dixiplina sira ne'ebé iha avaliasaun kontínua ka iha ezame iha époka normál ne'ebé iha:
 - a) falta;
 - b) deziste;
 - c) ka reprovadu.
 3. Aprovasaun iha époka rekursu nian bele, maibé, dependente hela mós ba klasifikasaun ne'ebé hetan tiha ona durante semestre ne'e, ka tinan ne'ebé iha komponente prátiku obrigatória.



4. Aseitasaun ba ezame ladevende ba apresentasaun rekerimentu, tenke halo, maibé estudante sira inskreve hamutuk ho departamentu ne'ebé refere ka eskola sira, iha termu no prazu sira-ne'ebé fiksa tiha ona iha Kalendáriu Akadémiku, iha ezame sira-ne'ebé propoin iha época ezame nian.

KAPÍTULU V

HADI'A NOTA

Artigu 31º

Rekerimentu

1. Kualkér estudante ne'ebé hetan tiha ona aprovasaun ba dixiplina sira durante nia kursu no hakarak hadi'a klasifikasaun ne'ebé nia refere, sei bele rekere, ho karta ne'ebé imprime própriu, ba Diretór Departamentu ka Eskola ne'ebé refere atu realiza ezame hodi hadi'a nota iha dixiplina sira-ne'e.
2. Ezame hodi hadi'a nota, tenke realiza iha tinan tuir kedas tinan ne'ebé hetan aprovasaun ne'e, liuliu ba alunu sira tinan dahikus kursu nian, no participa iha momento ezame final
3. Estudante sira-ne'ebé maka tama iha último anu kursu nian, iha kondisaun hodi konklui iha tinan akadémiku ne'e, sira bele rekere atu hadi'a nota ba dixiplina sira ho aprovasaun iha tinan ne'e duni.
 4. Númeru másimu hodi hadi'a nota sira-ne'ebé rekere tiha ona puranu sei hala'o ezame tolu.

Artigu 32º

Limite ba Hadi'a Nota

1. Kualkér situasaun eskolár estudante nian, ida-ne'e só bele rekere ezame hadi'a nota nian dala ida de'it iha kada dixiplina.
2. Estudante falta iha ezame hadi'a nota nian, labele hato'o deskulpa hanesan motivu hodi rekere fali ezame ida-ne'e duni, nein hato'o razaun hodi hato'o retornu ba taxa sira-ne'ebé iha relasaun ho ida-ne'e.
3. Depoizde rekerimentu estudante nian hodi lansa diploma ka sertifikadu finál, labele hato'o ezame hadi'a nota nian.



Artigu 33º

Klasifikasaun Finál Depoizde Hadi'a Nota

Klasifikasaun finál ba dixiplina ida, depoizde ezame hadi'a nota nian maka:

- a) Iha kazu ba hetan aprovasaun iha ezame hadi'a nota nian, klasifikasaun finál sei hili ida-ne'ebé di'ak liu entre nota rua ne'ebé hetan tiha ona, nota anteriór no nota ne'ebé hetan iha ezame hadi'a nota nian ne'e.
- b) Se lamosu karik iha ezame ne'e, deziste, reprova ka lahetan nota ne'ebé boot, sei mantein klasifikasaun ne'ebé iha tiha ona antesde husu ezame hadi'a nota nian.

Artigu 34º

Taxa ba Hadi'a Nota

Hadi'a nota depende ba pagamentu taxa ida , kuantitativu nian ne'ebé fiksa husi Konsellu Jestaun UNTL nian, selu iha momentu apresentasaun rekerimentu.


KAPÍTULU VI

TRABALLU FINÁI KURSU NIAN

Artigu 35º

Traballu Finál Kursu nian

1. Traballu finál kursu nian (TFC) maka traballu sientífiku ida-ne'ebé elabora tiha ona husi kada estudante-kandidatu hodi hetan grau ida, no ne'ebé konstitui parte integrante ba planu kurrikulár hodi hetan grau ida-ne'e duni.
2. TFC bele mós realiza ho forma Monografia, Projeitu, Teze ka forma avaliasaun seluk ne'ebé define tiha ona iha Planu Kurrikulár ba kada kursu ne'ebé mensiona tiha ona.
3. Estudante bele komesa prepara ninia TFC, independentemente ba inskrisaun ida-ne'e duni, asinke hetan aprovasaun iha, pelumenus, kréditu ECTS nian 80% husi nia planu kurrikulár.
4. Termu no kondisaun sira ne'ebé maka kada estudante tenke formaliza ninia intensaun hodi hahú TFC, ka, formaliza nia kandidatura, estabesele tiha ona tuir norma ne'ebé determina tiha ona tuir kada Faculdade.
5. Preparasaun ba TFC tenke realiza ona tuir orientasaun dosente ida nian.
6. Estudante, ho koñesimentu ne'ebé nia hetan tiha ona husi nia orientadór, bele rekere ezisténsia ko-orientadór ida nian.
7. Universidade Nacional Timor Lorosa'e sei disponivel ba estudante sira, iha regulamentu própriu, regra sira-ne'ebé utiliza hodi hakerek no apresentasaun traballu eskritu sientífiku sira ho



adaptasaun ba sistema sitasaun nian ida no referénsia bibliografika ne'ebé rekoñese tiha ona internasionalmente hodi halo teze sira no publikasaun sientífika sira.

Artigu 36º

Inskrisaun iha TFC

1. Inskrisaun iha TFC ne'e obrigatória, bele realiza ho modelu ida-ne'e duni no prazu sira-ne'ebé fiksa tiha ona iha kalendáru akadémiku ba inskrisaun sira iha dixiplina sira seluk.
2. Inskrisaun iha TFC ne'e permite naran katak estudante ne'e:
 - a) Hetan tiha ona aseitasaun ba nia kandidatura ne'ebé temi iha nº 3 artigu 33º;
 - b) Hetan másimu dixiplina tolu ne'ebé sei falta, aleinde TFK, hodi kompleta kursu ne'e;
3. Orientadór no Ko-Orientadór TFK estudante nian dezigna tiha ona depoizde inskrisaun, durante loron sanulu-resin-lima nia laran, ho despaxu Konsellu Pedagójiku no Sientífiku Faculdade nian.
4. Se la rekere karik diskusaun ba TFK durante tinan akadémiku ne'ebé nia realiza inskrisaun, inskrisaun ne'e sei bele repete fali iha faze inskrisaun nian tuirmai.
5. Inskrisaun ne'ebé refere iha número anteriór tenke akompaña husi informasaun Konsellu Pedagójiku no Sientífiku Faculdade nian rona husi orientadór, katak estudante ne'e kumpre programa traballu sira-ne'ebé aprova tiha ona.

Artigu 37º

Entrega TFC

Rekolla kondisaun sira seluk para hetan grau, estudante bele apresenta TFC no rekere nia diskusaun públika ba Konsellu Pedagójiku no Sientífiku Faculdade nian.

Artigu 38º

Konstituisaun Júri nian ba Diskusaun TFC

1. Traballu Finál Kursu nian maka objetivu apresiasaun no diskusaun públika husi jurí kolektivu ida.
2. Juri ne'e nomeadu husi Konsellu Pedagójiku no Sientífiku Faculdade nian, tuir proposta husi Diretór Departamentu ne'ebé refere ka Diretór Eskola nian, iha loron tolunu tuimai entrega ba TFC.
3. Jurí konstitui husi mínimu membru na'in-tolu, inklui Orientadór ka Ko-Orientadór, ne'ebé sira labele prezide ka harii husi maioria.



4. Membru jurí sira tenke espesialista iha domínio ba traballu finál kursu nian ne'ebé nia halo parte bá no sira nomeadu ho grau titulár mestre entre nasional ka estranjeiru, ka espesialista ba méritu ne'ebé rekoñesidu husi Konsellu Pedagójiku no Sientífiku Faculdade nian.
5. Despaxu ba nomeasaun jurí nian ne'e maka determina ninia membru ida-ne'ebé maka prezide ida-ne'e.
6. Despaxu tenkesér komunika ho eskritu, iha prazu ba loron lima, ba membru jurí sira no ba kandidatu, no prova sira tenke fó-sai iha fatin-públiku Universidade nian.

Artigu 39º

Funsionamentu Júri nian

1. Prezidente jurí konkorda ho membru sira seluk hodi determina ezaminadór ba Traballu Finál kursu nian.
2. Deliberasaun jurí nian simu husi maioria membru ne'ebé harii atravezde votasaun nominál ne'ebé justifika tiha ona, konfere tiha ona kada ida, nota avaliasaun nian ida tuir artigu 19º iha regulamentu ida-ne'e, la permite abstensaun.
3. Ba reuniaun sira jurí nian sei hakerek iha akta sira.
4. Se iha karik falta ka impedimentu husi prezidente jurí, ida-ne'e substituidu husi membru ne'ebé gradua uluk no, karik membru rua ka liu ho grau akadémiku ne'ebé hanesan, nune'e sei iha tan tempu.

Artigu 40º

Aktu Públiku Defeza nian

1. Prova diskusaun no defeza ba Traballu finde Kursu tenke hala'o iha loron tolunu liutiha despaxu nomeasaun juri nian.
2. Prova ne'ebé refere iha número anteriór la bele dura liu minutu sianulu, tenke proporsiona ba kadidatu tempu hanesan ne'ebé membru júri uza hodi ko'alia.

Artigu 41º

Avaliasaun ba TFK

1. Rezultadu avaliasaun nian sei fó-sai tuir enunsiadu iha artigu 19º, hetan aprovasaun hosi TFC ne'ebé klasifika média kuantitativa votu membru juri sira-nian bele hanesan ka liu valor lima (número tomak) no klasifikasaun kualitativa hanesan ou boot liu "C".
2. Se la iha aprovasaun implica katak tenke hala'o fali TFC.



KAPÍTULU VII
KALENDÁRIU AKADÉMIKU

Artigu 42º

Kalendáriu Akadémiku

1. Tinan akadémiku ne'e Kalenáriu Akadémiku maka regula.
2. Ho despaxu Reitor nian, atu publika iha fulan-Outubru antezde inísiu tinan akadémiku foun, sei aprova no tau iha kalendáriu akadémika, ne'ebé fó-sai, pelumenus iha loron sira tuirmai ne'e:
 - a. Inísiu no Termu ba aula sira;
 - b. Époka ba ezame Normál;
 - c. Époka ba Ezame Rekursu;
 - d. Prazu ba matríkula;
 - e. Prazu ba inskrisaun iha kada semestre;
 - f. Férias eskola nian;
 - g. Pauza interkalár sira seluk;
 - h. Feriadu ofisiái sira;
 - i. Semana ba Orientasaun Akadémika
 - j. Serimonia Graduasaun nian;
 - k. Eventu interessante sira seluk.

Artigu 43º

Tinan Akadémiku

1. Tinan akadémiku hala'o husi 1 Janeiru to'o 31 Dezembru anu sivíl nian, no iha semestre rua:
 - a) Semestre dahuluk, ka semestre ímpar, ne'ebé hahú iha inísiu semana daruak fulan-Janeiru nian no hotu iha loron ikus ezame semestre nian;
 - b) Semestre daruak, ka semestre pár, ne'ebé hahú depoizde termu semestre impar nian ho intervalu semana rua no hotu iha finál fulan-Novembru.
2. Ba estudante foun sira-ne'ebé hahú sira-nia estudu iha primeiru anu iha sira-nia kursu ida-idak, aula sira semestre dahuluk nian sei hahú kedas depoizde hala'o tiha matríkula ida-idak no semana orientasaun akadémika, hala'o liutiha semana daruak fulan-Janeiru nian.
3. Laiha prejuízo dispozisaun oinseluk iha despaxu fiksasaun Kalendáriu Akadémiku nian, durasaun sira tuirmai ne'e sei uza nu'udar referénsia iha elaborasaun kalendáriu Akadémiku ida-idak:
 - a) Semestre ne'e sei iha durasaun normál semana 19.
 - b) Períodu aula nian sei iha durasaun normál semana 15.



- c) Períodu ezame nian sei iha durasaun semana 4.

Artigu 44º

Ezame Finál sira no Prova Avaliasaun sira seluk

1. Ezame finál sira dekorre iha semana haat ikus semestre nian ne'ebé refere.
2. Klasifikasaun finál sira-ne'ebé iha relasaun ho prova sira ne'ebé hala'o iha época normal tenke divulga ho antesedénsia mínimu loron lima relativamente loron ne'ebé atu hala'o ezame rekursu nian ba dixiplina ne'eé hanesan.

Artigu 45º

Férias no Pauza Interkalár sira

1. Pauza Interkalár semestre nian dekorre normalmente iha semana rua antezde hahú segundu semestre.
2. Férias eskolár nian dekorre normalmente entre fulan-Dezemburu no Janeiru sai data espesífika no durasaun fiksa tiha ona iha kalendáriu Akadémiku iha tinan-tinan.
3. Atu pauza Interkalár ka Férias Eskolár sira-nian la impede realizasaun atividade preparatória ka remata semestre ne'ebé pendente hela ne'ebé presiza ba lala'ok actividade akadémuka normal no obrigasaun UNTL nian.

Artigu 46º

Pauta ba Resultadu Finál

Entrega ba publikasaun iha Divizaun Administrasaun Akadémika competente iha Faculdade ida-idak kona-ba pauta rezultadu final nian ka suporte informasaun adekuada seluk ne'ebé substitui tenkesér hotu iha loron sanulu-resin-lima imediatu hosi Diretór Departamentu ida-idak.

KAPÍTULU VIII

OBTENSAUN BA GRAU NO DIPLOMA

Artigu 47º

Obtensaun ba Grau

1. Hodi hetan grau ka título, estudante tenke halibur kritériu sira tuirmai ne'e:
 - a) Hetan aprovasaun ba dixiplina hotu-hotu iha nia planu kurrikulár;
 - b) Hetan índise Prestasaun Kumulativu mínimu 2,00;
 - c) Lahetan kualkér klasifikasaun kualitativa ho "D" ka "E";
 - d) Hetan aprovasaun iha Traballu Finál Kursu nian;

- e) Selu propinas no taxa hotu-hotu ne'ebé bele aplika;
- f) Prienxe kualkér rekizitu seluk ne'ebé legál ka tuir Regulamentu.

Artigu 48º

Obtensaun Sertifikadu Konkloi Kursu no Diploma sira

Norma ba emisaun sertifikadu konkloi kursu nian no diplima sira sei apresenta liuhosi regulamentu própriu no iha termu Lei nian.

Artigu 49º

Judisium

1. Para konsideradu aprovalu iha Universidade Nasionál Timor Lorosa'e, no naran katak bele eleitu hodi atende serimónia ofisiál graduasaun nian, kada estudante tenke halibur kritériu hotu-hotu tuirmai ne'e to'o loron 30 antezde data ne'ebé tau tiha ona iha ajenda ba serimónia graduasaun nian:
 - a. Konkloi ho susesu ba dixiplina hotu-hotu tau iha planu Currikulár kursu nian ne'ebé nia pertense bá;
 - b. Ninia índise Prestasaun Komulativu (IPK) finál ne'ebé hanesan ka superiór 2,00;
 - c. Pagamentu hotu-hotu no taxa-pendente sira ho ninia Universidade ne'ebé selu tiha ona;
 - d. Konkloi no defende tiha ho susesu ninia Traballu depoizde kursu hotu nia hetan avaliasaun pozitivu.
2. Verifikasaun no homologasaun ba rekizitu sira refere iha leten maka hala'o iha serimónia Judisium, ne'ebé organiza tuir kada Fakultade to'o loron 15 molok data ne'ebé tau tiha ona iha ajenda ba serimónia graduasaun.

Artigu 50º

Serimónia Graduasaun nian

1. Serimónia graduasaun nian sei realiza tuir Kalendáriu Akadémiku.
2. Estudante ho sertifikadu konkloi kursu nian tenke inskreve ba serimónia graduasaun nian no hetan diploma, tuir grau ne'ebé korresponde bá.
3. Rekizitu no prosedimentu sira ba serimónia graduasaun nian define tiha ona husi Divizaun Administrasaun Akadémika no Estudantíl.



KAPÍTULU IX
DISPOZISAUN FINÁL

Artigu 51º

Regulamentu ba Kursu Graduasaun Avansada

1. Laiha prejuízo ba ne'ebé estabese tiha ona iha regulamentu ida-ne'e, pós-graduasaun sira, mestradu no doutoramentu define tuir regulamentu espesífiku, liuliu ne'ebé refere ba organizaun atividade hanorin nian, rejime inskrisaun nian, rejime avaliasaun nian, jurí avaliasaun nian sira no kalendáriu akadémiku.
2. Regulamentu espesífiku ne'ebé refere iha pontu anteriór mak responsabilidade Konsellu Doutór sira UNTL nian, laiha impedimentu ba asaun kodenasaun global hosi órgaun kompetente ba efeitu ne'e, tenke fó-sai ba públika.

Artigu 52º

Atualizasaun

Regulamentu akadémiku ida-ne'e bele sai objetu revizaun hosi Senadu Akadémiku, rona Konsellu Doutór sira, Konsellu Jerál no Reitór.

Artigu 53º

Dispozisaun Revogatória

1. Regulamentu ida-ne'e anula Regulamentu Akadémiku anteriór hanesan mós norma regulamentár hotu-hotu ne'ebé aprova tiha ona to'o data publikasaun nian ne'ebé temi norma sira-ne'ebé kontradís ho regulemenrtu ida-ne'e.
2. Norma Estatutu UNTL nian sira seluk no Regulamentu lejizlativu ne'ebé fó-sai iha Timor-Leste, ne'ebé iha valór liu kona-ba regulamentu ida-ne'e karik iha kontradisaun.

Artigu 54º

Rejime Tranzisaun nian

1. Regulamentu ida-ne'e válidu ba estudante hotu-hotu Universidade Nasionál Timor Lorosa'e nian ne'ebé matríkula depoizde nia hala'o tiha ninia matríkula.
2. Ba estudante sira-ne'ebé inskritu antezde nia hahú tama iha universidade, regulamentu ida-ne'e válidu, apropriadu konforme possibilidade ne'ebé iha, ba limite prazu sira-nian no métodu sira-ne'ebé hakerek tiha ona antes konsidera ho interese di'ak ne'ebé alunu iha.



Artigu 55º

Hahú Funsiona

Regulamentu ida-ne'e publika tiha ona no distrbui tiha ona iha inísiu segundu semestre 2013 nian, hetan períudu *Vacatio Legis* ba fulan-neen. Ne'e signifika katak hahú funsiona iha dia 1 Janeiru 2014, laiha impedimentu ba preparativu sira-ne'ebé presiza ba implementasaun no treinamentu durante fulan neen antes.

Asina, Prezidente Konsellu Jerál UNTL:



Madre Guilhermina Marçal, FdCC